



---

Број: 05/8-50-14-465-4/15

Сарајево, 15.9.2015.

## Z A P I S N I K

### **3. sjednice Komisije za izbor i praćenje rada Agencije za prevenciju korupcije i koordinaciju borbe protiv korupcije, održane 23.7.2014., od 11 do 12,45 sati**

Sjednicu Komisije za izbor i praćenje rada Agencije za prevenciju korupcije i koordinaciju borbe protiv korupcije (u daljnjem tekstu: Komisija) sazvala je predsjedavajuća Komisije Aleksandra Pandurević.

Sjednici su prisustvovali članovi Komisije: Aleksandra Pandurević, Halid Genjac, Darko Babalj, Hanka Vajzović i Milenko Obad.

Opravdano su odsustvovali Borjana Krišto i Bariša Čolak.

Sjednici su prisustvovali i gosti - predstavnici institucija vlasti BiH, međunarodnih organizacija u BiH, medija, te službenici Sekretarijata Parlamentarne skupštine BiH:

- Sead Lisak i Dragan Slipac, Agencija za prevenciju korupcije i koordinaciju borbe protiv korupcije,
- Dragana Gluhović, Eric Freabue i Sabina Bosović, Delegacija EU u BiH,
- Semira Degirmendžić, Dnevni avaz,
- Ljerka Bojić, rukovoditeljica Sektora za druga parlamentarna tijela PSBiH, i
- Jovica Katić, sekretar Komisije.

Kako nije vođena rasprava o prijedlogu dnevnog reda, konstatirano je da 3. sjednica Komisije ima sljedeći

## DNEVNI RED

- 1. Usvajanje Zapisnika konstituirajuće sjednice Komisije,**
- 2. Usvajanje Zapisnika 2. sjednice Komisije,**
- 3. Razmatranje Izvještaja o radu Agencije za prevenciju korupcije i koordinaciju borbe protiv korupcije za 2014. godinu (sačinilac: Agencija za prevenciju korupcije i koordinaciju borbe protiv korupcije),**

4. **Razmatranje Informacije o provedenim aktivnostima na izradi Nacrta strategije za borbu protiv korupcije 2015. - 2019. i pratećeg akcionog plana (sačinilac: Agencija za prevenciju korupcije i koordinaciju borbe protiv korupcije),**
5. **Razmatranje Informacije o procesu koordinacije i donošenja planova borbe protiv korupcije u institucijama BiH (sačinilac: Agencija za prevenciju korupcije i koordinaciju borbe protiv korupcije),**
6. **Razmatranje Informacije o procesu prevencije korupcije i donošenja planova integriteta u institucijama BiH (sačinilac: Agencija za prevenciju korupcije i koordinaciju borbe protiv korupcije),**
7. **Razmatranje Izvještaja o provođenju Zakona o zaštiti lica koja prijavljuju korupciju u institucijama Bosne i Hercegovine (sačinilac: Agencija za prevenciju korupcije i koordinaciju borbe protiv korupcije),**
8. **Razmatranje Informacije o trenutnom statusu aktivnosti u pogledu provođenja preporuka GRECO-a u Bosni i Hercegovini (sačinilac: Agencija za prevenciju korupcije i koordinaciju borbe protiv korupcije),**
9. **Informacija o učešću na Međunarodnoj konferenciji „Transparentnost i odgovornost za djelotvoran nadzor: uloga parlamenta“ (sačinilac: član Komisije za izbor i praćenje rada Agencije za prevenciju korupcije i koordinaciju borbe protiv korupcije Darko Babalj),**
10. **Tekuća pitanja.**

#### **Ad.1. Usvajanje Zapisnika konstituirajuće sjednice Komisije**

O prijedlogu zapisnika nije vođena rasprava.

*Komisija je jednoglasno, s pet glasova „za“, usvojila Zapisnik konstituirajuće sjednice.*

#### **Ad.2. Usvajanje Zapisnika 2. sjednice Komisije**

*Aleksandra Pandurević*, predsjedavajuća Komisije otvorila je raspravu o Prijedlogu zapisnika.

*Halid Genjac*, član Komisije, sugerirao je da se Zapisnik 2. sjednice korigira konstatacijom da je na prošloj sjednici, kao važeći, usvojen stari Poslovnik o radu Komisije, uz izmjenu kojom se regulira pitanje kvoruma, na način da kvorum čini pet članova Komisije, a da Komisija odluke donosi većinom glasova, koja uključuje i po jednog predstavnika iz svakog konstitutivnog naroda. Također, naveo je da je Komisija usvojila zaključak da sekretarijat pripremi prijedlog poslovnika, uvažavajući sve nove izmjene u Zakonu o Agenciji za prevenciju korupcije i koordinaciju borbe protiv korupcije, kao i Jedinstvena pravila za izradu pravnih propisa u institucijama BiH, te da takav dokument, kada bude spreman, bude usvojen kao poslovnik Komisije. Do njegovog usvajanja važit će stari Poslovnik o radu Komisije, uz

njegovu navedenu usvojenu izmjenu. Genjac je zaključio da na taj način Komisija dobiva tzv. aktivnu poziciju, čime se omogućava njen rad.

***Komisija je jednoglasno, s pet glasova „za“, usvojila Zapisnik 2. sjednice, uz korekciju koju je predložio član Komisije Halid Genjac.***

### **Ad.3. Razmatranje Izvještaja o radu Agencije za prevenciju korupcije i koordinaciju borbe protiv korupcije za 2014. godinu (sačinilac: Agencija za prevenciju korupcije i koordinaciju borbe protiv korupcije)**

*Aleksandra Pandurević*, predsjedavajuća Komisije, otvarajući raspravu o ovoj tački dnevnog reda, dala je riječ rukovodiocima Agencije za prevenciju korupcije i koordinaciju borbe protiv korupcije (u daljnjem tekstu: Agencije) da daju uvodne napomene po predloženom materijalu.

*Sead Lisak*, direktor Agencije, naveo je da je Prijedlog izvještaja urađen metodološki na bazi unificiranog modela primijenjenog i tokom procesa izvještavanja iz 2012. i 2013. godine. Istakao je da izvještajni period karakterizira dalje jačanje kapaciteta ove agencije, priprema i pravovremeno provođenje kako njenih osnovnih, tako i dodatnih nadležnosti koje je Agencija dobila usvajanjem dva nova zakona - Zakona o zaštiti lica koja prijavljuju korupciju u institucijama BiH i Zakona o izmjenama i dopunama Zakona o sukobu interesa u institucijama vlasti BiH. Uvodne napomene zaključio je konstatacijom da su u aneksu ovog izvještaja prikazane i ostale aktivnosti Agencije, te da je pripremljen i aneks koji prikazuje do kojeg nivoa su provedene specifične mjere i aktivnosti iz proteklog Akcionog plana za provođenje Strategije za borbu protiv korupcije za period 2009. - 2014. godina. Tokom izvještajnog perioda realizirani su svi zaključci oba doma Parlamentarne skupštine BiH, kao i zaključci Vijeća ministara BiH koji se odnose na konkretne obaveze Agencije, te preporuke Ureda za reviziju institucija BiH date u izvještaju o finansijskom poslovanju Agencije.

Tokom rasprave o ovoj tački dnevnog reda, u kojoj su učestvovali svi prisutni članovi Komisije, diskutirano je o neadekvatnosti prostorija koje je ova agencija dobila od Vijeća ministara BiH. Informirajući članove Komisije o dosadašnjem toku rješavanja ovog pitanja, direktor Lisak naveo je da je Agencija uputila Vijeću ministara BiH zahtjev za urgentnim preispitivanjem Odluke o rasporedu kancelarijskog prostora, a što je podržala i Komisija upućivanjem dopisa Vijeću ministara BiH. Naglasio je da je Vijeće ministara BiH na prethodnoj sjednici donijelo zaključak kojim je zadužilo Službu za zajedničke poslove institucija BiH da preispita Odluku o smještaju institucija BiH (vidi puni naziv) u vezi s rasporedom institucija u Istočnom Sarajevu. Također, naveo je da je u međuvremenu održan sastanak rukovodstva Agencije s direktorom Službe za zajedničke poslove institucija BiH i njegovim zamjenikom, koji su ih informirali o tome da Služba neće mijenjati prvobitno donesenu odluku o smještaju ove agencije i drugih institucija koje su obuhvaćene predmetnom odlukom, bez obzira na zaključak koji je usvojilo Vijeće ministara BiH.

**Halid Genjac**, član Komisije, u vezi s navedenim predložio je da Komisija uputi predsjedavajućem Vijeća ministara BiH dopis u kojem će konstatirati da ovo nezavisno tijelo Parlamentarne skupštine BiH smatra da je Odluka o raspodjeli kancelarijskog prostora u zgradi za smještaj institucija BiH u Istočnom Sarajevu, kao rješenje pitanja trajnog smještaja Agencije za prevenciju korupcije i koordinaciju borbe protiv korupcije, neadekvatna, potpuno neprimjerena, te da ne omogućava rad jedne od najznačajnijih agencija u Bosni i Hercegovini, diskreditirajući njenu ulogu, a što će u budućem periodu proizvesti dodatni niz problema u funkcioniranju ove agencije. Kako bi ustanovila ključne razloge za donošenje ovakve odluke, Komisija će pozvati ovlaštenog predstavnika Vijeća ministara BiH da prisustvuje idućoj sjednici ove komisije i zatražiti od njega pružanje svih relevantnih informacija, a s konačnim ciljem konačnog rješavanja ovog problema.

**Članovi Komisije jednoglasno su, s pet glasova „za“, prihvatili zaključak koji je predložio Halid Genjac.**

Nadalje, tokom rasprave o ovoj tački dnevnog reda diskutirano je i o saradnji Agencije s Tužilaštvom BiH, Izvještaju o reviziji finansijskog poslovanja Agencije u prošloj godini, statusu predmeta zaštićenih prijavitelja korupcije u institucijama BiH, pitanju sukoba interesa, provođenja preporuka iz oblasti finansiranja političkih stranaka, kao i realizaciji projekta „Borba protiv korupcije u visokom obrazovanju“, te provođenju preporuka i dosadašnjih izvještaja Grupe zemalja Vijeća Evrope protiv korupcije (GRECO). U okviru razmatranja izvještaja o radu Agencije za prošlu godinu, članovi Komisije referirali su se i na pregled institucija BiH koje su donijele interne pravilnike o prijavljivanju korupcije, te na statistički pregled prijava u vezi s indicijama koruptivnog ponašanja zaprimljenim i obrađenim tokom izvještajnog perioda. Također, tokom rasprave konstatirano je da Agencija treba tražiti više medijskog prostora kako bi rezultati njenog rada došli do bosanskohercegovačke javnosti, kao i to da sva tri javna emitera u BiH trebaju informativno - edukativnim programom da se uključe u proces prevencije korupcije u BiH.

**Aleksandra Pandurević**, predsjedavajuća Komisije, predložila je da sekretar Komisije za izbor i praćenje rada Agencije za prevenciju korupcije i koordinaciju borbe protiv korupcije, u saradnji s direktorom Agencije, do naredne sjednice Komisije sačini dopis koji bi Komisija uputila Uredu za reviziju institucija BiH, a kojim bi pozvala predstavnike ovog ureda na sklapanje memoranduma o saradnji između Agencije za prevenciju korupcije i Ureda za reviziju institucija BiH.

**Članovi Komisije jednoglasno su, s pet glasova „za“, usvojili navedeni zaključak koji je predložila predsjedavajuća Aleksandra Pandurević.**

**Komisija je zatim jednoglasno, s pet glasova „za“, usvojila Izvještaj o radu Agencije za prevenciju korupcije i koordinaciju borbe protiv korupcije za 2014. godinu sa zaključcima sadržanim u njemu i prosljedila ga kolegijima oba doma Parlamentarne skupštine BiH u daljnju proceduru.**

**Ad.4. Razmatranje Informacije o provedenim aktivnostima na izradi Nacrta strategije za borbu protiv korupcije 2015. - 2019. i pratećeg akcionog plana (sačinilac: Agencija za prevenciju korupcije i koordinaciju borbe protiv korupcije)**

O predmetnoj informaciji nije vođena rasprava.

*Komisija je jednoglasno, s pet glasova „za“, podržala Informaciju o provedenim aktivnostima na izradi Nacrta strategije za borbu protiv korupcije 2015. - 2019. i pratećeg akcionog plana.*

**Ad.5. Razmatranje Informacije o procesu koordinacije i donošenja planova borbe protiv korupcije u institucijama BiH (sačinilac: Agencija za prevenciju korupcije i koordinaciju borbe protiv korupcije)**

*Dragan Slipac*, zamjenik direktora Agencije, dao je kratke uvodne napomene u vezi s ovim materijalom, u kojima je naveo da su sve institucije na nivou države BiH napravile svoje planove integriteta, te da se procesi izrade ovih planova dalje nastavljaju njihovom izradom i usvajanjem na nižim nivoima vlasti u BiH.

U raspravi o ovoj tački dnevnog reda učestvovala su Aleksandra Pandurević i Hanka Vajzović.

*Komisija je potom jednoglasno, s pet glasova „za“, podržala Informaciju o procesu koordinacije i donošenja planova borbe protiv korupcije u institucijama BiH.*

**Ad.6. Razmatranje Informacije o procesu prevencije korupcije i donošenja planova integriteta u institucijama BiH (sačinilac: Agencija za prevenciju korupcije i koordinaciju borbe protiv korupcije)**

*Alaksandra Pandurević*, predsjedavajuća Komisije, konstatirajući da se radi o informaciji koja predmetnu materiju tretira zaključno s krajem 2014. godine, predložila je da Agencija dostavi Komisiji informaciju o aktuelnom stanju po pitanju donošenja planova integriteta, kako bi Komisija nakon toga, ukoliko se za tim ukaže potreba, uputila dopis upozorenja onim institucijama koje po ovom pitanju nisu ispunile svoju obavezu.

*Komisija je jednoglasno, s pet glasova „za“, podržala Informaciju o procesu prevencije korupcije i donošenja planova integriteta u institucijama BiH.*

**Ad.7. Razmatranje Izvještaja o provođenju Zakona o zaštiti lica koja prijavljuju korupciju u institucijama Bosne i Hercegovine (sačinilac: Agencija za prevenciju korupcije i koordinaciju borbe protiv korupcije)**

*Sead Lisak*, direktor Agencije, dao je kratke uvodne napomene u vezi s ovim izvještajem.

U raspravi o ovom izvještaju učestvovali su članovi Komisije Halid Genjac i Darko Babalj. Zamjenik direktora Agencije Dragan Slipac odgovorio je na pitanja proistekla iz rasprave.

*Komisija je zatim jednoglasno, s pet glasova „za“, usvojila Izvještaj o provođenju Zakona o zaštiti lica koja prijavljuju korupciju u institucijama Bosne i Hercegovine.*

**Ad.8. Razmatranje Informacije o trenutnom statusu aktivnosti u pogledu provođenja preporuka GRECO-a u Bosni i Hercegovini (sačinilac: Agencija za prevenciju korupcije i koordinaciju borbe protiv korupcije)**

*Sead Lisak*, direktor Agencije, dao je kratke uvodne napomene u vezi s ovom informacijom.

*Halid Genjac*, član Komisije, u raspravi o ovoj informaciji predložio je zaključak da Interresorna radna grupa za izmjene izbornog zakonodavstva BiH, koja će raditi na izmjenama tekstova Izbornog zakona, Zakona o finansiranju političkih stranaka i Zakona o sukobu interesa u institucijama vlasti BiH, a koju čine predstavnici Parlamentarne skupštine BiH, Vijeća ministara BiH i Centralne izborne komisije BiH, na svoje sastanke pozivaju i rukovodstvo Agencije za prevenciju korupcije i koordinaciju borbe protiv korupcije, kako bi Agencija napravila i dostavila Interresornoj radnoj grupi u amandmanskoj formi svoje prijedloge izmjena ovih zakonskih tekstova u skladu s preporukama GRECO-a.

*Komisija je jednoglasno, s pet glasova „za“, usvojila Informaciju o trenutnom statusu aktivnosti u pogledu provođenja preporuka GRECO-a u Bosni i Hercegovini.*

**Ad.9. Razmatranje Informacije o učešću na Međunarodnoj konferenciji „Transparentnost i odgovornost za djelotvoran nadzor: uloga parlamenta“ (sačinilac: član Komisije za izbor i praćenje rada Agencije za prevenciju korupcije i koordinaciju borbe protiv korupcije Darko Babalj)**

*Darko Babalj*, član Komisije i sačinilac Informacije, predložio je Komisiji usvajanje dva zaključka:

- 1. Komisija za izbor i praćenje rada Agencije za prevenciju korupcije i koordinaciju borbe protiv korupcije će s ciljem pokretanja inicijative formiranja nacionalnog ogranka Globalne organizacije parlamentaraca za borbu protiv korupcije (GOPAK) u Parlamentarnoj skupštini BiH dostaviti zahtjev svim klubovima poslanika i delegata u Parlamentarnoj skupštini BiH da, prema svojim željama i*

*mogućnostima, predlože jednog svog predstavnika za člana ogranka GOPAK-a Parlamentarne skupštine BiH.*

- 2. Zadužuje se sekretar Komisije za izbor i praćenje rada Agencije za prevenciju korupcije i koordinaciju borbe protiv korupcije da, u saradnji s nadležnim službama Sekretarijata Parlamentarne skupštine BiH, sačini neophodne inicijalne materijale za formiranje ogranka GOPAK-a u Parlamentarnoj skupštini BiH, te da o tome obavijesti Komisiju.*

*Komisija je jednoglasno, s pet glasova „za“, usvojila predmetnu informaciju, sa zaključcima koje je predložio član Komisije Darko Babalj.*

#### **Ad.10. Tekuća pitanja**

O tekućim pitanjima nije vođena rasprava.

Sjednica je okončana u 12,45 sati.

Sastavni dio ovog zapisnika čini tonski snimak 3. sjednice Komisije.

Sekretar Komisije  
**Jovica Katić**

Predsjedavajuća Komisije  
**Aleksandra Pandurević**

#### **Dostavljeno:**

- naslovu
- a/a